

馬巷廳志

卷十五

馬巷廳志卷十五

人物

人傑雖藉地靈地實因人而重馬巷分郡在同
邑東南素號海濱鄒魯自宋迄今人文輩出
之舊志足徵其中名臣忠烈循績武功儒林文
苑孝友義行隱逸依次考核惟嚴俾展是卷者
群興希賢之志實有厚望焉志人物

名臣

明

陳敦五
鍾錫
副全
六元

冥贈

林希元字茂貞號次崖正德丙子丁丑聯第進士授
南京大理寺評事世廟登極條上新政八要曰務
正學親正人用舊臣清言路急交脩持久大息中
官機務以拔禍根罷中官鎮守以厚邦本又言臺
諫諸臣默默於往時嘒嘒於今日竽瑟混聽菲葑
奚採宜考覈以清言路進士周祚等疏言近來章
奏紛紜無如希元所陳者乞畱神省覽見之施行
下所司議議上帝優詔嘉納焉遷寺正是時希元
名動兩都忌者側目會以議獄事忤寺卿陳琳南

京御史戚雄等疏論之降泗州判官泗饑辦賑周
詳青陽滄湖嘯聚九百人單車往諭皆解散且
貸其罪而賑恤之境內以安復以不屈當路棄官
歸大臣交疏薦之再起寺正擢廣東按察僉事鹽
屯二政條奏切近四款復以行於泗州者爲荒政
叢言上之帝可其奏通行天下尋改提督學校其
條訓多士務在闡繹經傳敦崇古典劇寇王畿剽
掠廣惠希元署按察篆率府衛兵指授方畧卽時
討平御賜白金陞南京大理寺丞上王政疏爲目

二十有一秩滿留內時遼東軍陵辱撫臣希元抗
疏極言姑息之弊忤旨謫欽州知州填接安南城
郭官舍半鞠墟莽悉心經畫之開誠先物約身裕
用塞弊竇興廢墜遷學育才廣置勸農之吏設立
屯田增脩營堡一意教養捍衛會有征安南之命
希元熟究其國中虛實強弱人情向背慨然以興
復爲已任疏六上而奉命大臣圖安靖第受其納
款請罪希元之說不行陞海北道兼管兵備珠池
朱崖軍民疲困珠盜橫行立條嚴禁一年而民蘓

盜息卒坐安南用兵事與督臣異議以拾遺罷歸
欽人建祠生祀之希元慷慨鯁直有俯視流俗澹
當宇宙之氣而才識亦練達世廟罷鎮守中官悉
歸內監自其一疏啟之而安南歸命還四峒亦希
元之議足以奪其魄焉家居手不釋卷晚年益究
義理精微之極參訂諸儒所定致知極物之說附
以已見曰更正大學經傳定本所著易經四書存
疑皆足羽翼朱子學者師之又其次崖文集祀鄉
賢又建專祠特祀於文廟之右

洪朝選字汝尹

一作字舜臣

號芳洲更號靜菴嘉靖丁酉

舉人辛丑進士除南京戶部主事出榷北新關抽
貨算緡度歲課幾何盈額而止津梁不閉任舶上
下事竣督放倉儲諸有規畫後人引以爲法一日
思所學未足非古人學優則仕之意上疏引疾客
毘陵僧舍與唐順之講德問業一年始歸又就王
慎中上下議論久之充然有得起爲南吏部卽出
督學西蜀端士習正文體持法秉公人想望其丰
采遷廣東參政調山西歲大祲寇盜充斥多方撫

輯殪其元兇破其黨與晉人頌之朝選不爲嚴嵩
所善而徐階深與之嚴敗遂以山西參政召入爲
大僕少卿尋進僉都御史提督操江疏論盜所由
起與所以止盜之方鑿鑿可行畱都以請旋進副
都御史巡撫山東禔躬以道馭下以法疏陳養民
課吏之政甚詳他議驛遞防河皆爲經久計檄所
司清差重役繁之弊隨地編差因糧制役巨戶無
所窺避藩府官校奪民田禁葦之悉歸民齊魯肅
然隆慶戊辰立爲刑部侍郎伸直臣沈鍊儒臣閻

樸寬而正巡撫楊順於理徐階去位張居正秉樞
遼王憲熯獄起居正以私憾欲以謀反置之死地
除其國屬朝選往勘命方下居正來謁坐定曰貴
處傳應嘉謀反今敝省遼王謀反朝選默然出門
又曰聞遼王差人入京行賄朝選曰果然當題奏
乃疏奏凡楚人入京皆盤詰沿途差兵護送勘事
官員及至襄陽撫按道府已勘成招副使施篤臣
抱牘請書名朝選曰未提審一人徒據現案成招
何須命我公等自成之可也數日施復來見曰遼

王府中監招兵旗反形已露朝選曰果反則我爲
興師討罪之大臣不然則勘事之大臣使人往覘
之報曰兵圍遼府三匝信息不通王聞法司到無
由訴監旗府內書伸冤二字終日跪伏旗下候命
朝選曰此臣子待罪禮也匹夫犯重辟求訴刑官
尚當審確招詳况親王乎古人有焚梁獄詞者奈
何媚權貴傷國家親親意置其事不問亡何施篤
臣又請云大人招要改便改必欲提人按覆審三
年亦招不成朝選見羅織已定不得已應曰除去

東坡志林 卷之五
謀反二字其淫虐貪暴則依前招遂以遼王照戴
掄典英事例送發高牆除其國母王氏妃給田十
頃屋一座養贍終身奏入居正猶以爲左心惡之
一時法司同往勘者俱論罷朝選辨本有權臣主
使之言居正忿益甚遂以大計劾罷歸會御史劉
畏所疏論居正指摘及施篤臣朝選曰令我聽指
使誣以反劉疏及我矣居正聞益恚謂朝選不死
且與劉犄角我也又當居正奪情時進士鄒元標
翰林吳中行疏列其不孝狀削籍遠戍朝選曾移

書壯之稱其文章節義爲居正所跡憾益深不可
解于是密使私人授旨於閩中諸當事或起之田
間或啗以大位或嚮以顯禍冀結其歡而速其謀
有知其冤不肯從者有身受其薦不忍從者朝選
性剛介不能容人過失里中不平事狷激言之有
宦家子模捏朝選手板櫟有司短長言於當道朝
選不知也時左布政勞堪以支放邊戍月餉搭新
鑄錢失軍心巡撫耿定向檄止之語頗侵堪適耿
招朝選講學每咨以時政堪疑朝選實中之耿以

憂去勞代之遂希居正意乘是藉快已憤陰遣邑
令金枝日夜捫據其無情事以報勞得之大喜以
聞於朝居正從中擬旨削籍逮訊堪得密報遂馳
戎卒逮朝選下臬獄不二日斃之獄中且謂朝選
在川中得回生藥暴尸四五日不得出尸蟲至出
戶朝選居官廉潔以名節自砥礪生平有學行政
事之稱致身鄉貳而家故貧嘗有詩云負郭原無
半頃腴山田新買百升餘里人莫笑清貧甚欲學
周黃恐不如臨居十年許一旦嬰奇禍以死士大

夫無不扼腕冤之者子兢訟冤闕下居正矯旨杖八十仍奪蔭其夏居正暴卒都諫李廷儀條其冤狀朝議堪回籍繼奪職甲申兢再訟父冤有旨下堪獄戍定海未幾詔復朝選官兢補蔭如故一時阿堪意鍛獄及造謗者俱相繼竄逐朝議猶以堪不正典刑未快人心云朝選善爲文所作有氣岸類其人著有芳洲摘稿歸田稿續歸田稿祀鄉賢李獻可字堯俞號松汀隆慶丁卯舉人萬歷癸未進士初授武昌府推官疏滯雪抑讞獄得情上官事

有不決屬之輒刃解臬掾有犯法者臬囑寬之不從徵入戶科給事中會潞王之國疏請諭制在國無以縱敗禮在途毋以擾困民太后聞大怒請加譴帝特全之越日譙宮中疏自袖墜顧近侍曰此李某疏勿失也他如請內帑以賑饑饉決章奏以防壅蔽伸法紀以全安攘所條陳悉中竅轉禮科右刑科左主試山西時慶得士值京考以莊愼輔鑑裁物情翕如陞禮科都給事拜官甫三日上皇太子出閣講學疏言冊立之典可稍緩而待來年

諭教之典不可停而虛今日皇長子今年十一歲
去古人八歲始學之時已踰其三宜及今春孟特
令禮卿酌定儀注擇吉施行至於輔導尤宜選孝
悌博聞有道術者爲之何必委巷伯之倫而秘之
房闥之內哉疏入有旨謫外元輔王家屏力救封
還內降至於再三帝怒甚削籍罷歸家屏亦遂置
相爭獻可抵家日以書史自娛事繼母孝撫季弟
甚篤悉予先貲構廬居之誘誨歛至人不知其爲
異母也溫讓謙遜與人交情至於文不以所長掩

人不言人過有善吹揚如不及起家二十年田宅
僅中人產年六十一卒祀鄉賢

蔡守愚守體言號發吾浯洲人萬歷乙酉丙戌聯第
進士授南儀制司主事迎母就養暇與同舍諸名
公證彙古今所得益深詩文日進丁內艱歸襄事
畢採撫前言往行有裨風教者彙爲明倫寶鑑一
書後除工部屯田司主事督理易州龍灣二廠舊
時炭直不早給而惜薪司復從中索例不得以時
納甚且以不如式駁還大爲商病則爲移內外主